

21/03/2002

Wakil Pas pertahan perkataan 'barua'

WAKIL Pas mengambil kesempatan daripada tindakan mereka menghalalkan penggunaan perkataan 'barua' oleh pemimpin tertinggi mereka baru-baru ini untuk mengenakan penyokong kerajaan di Dewan Rakyat.

Abdul Fatah Harun (Pas-Rantau Panjang) yang mempertahankan bahawa 'barua' adalah perkataan biasa bagi orang Kelantan bukan satu makian, menggunakannya terhadap Setiausaha Parlimen di Jabatan Perdana Menteri, Datuk Noh Omar.

"Kalau kita kata barua itu biasalah. Kalau saya nak kata Yang Berhormat (Noh) barua Umno dan barua PM (Perdana Menteri) pun biasa saja," katanya ketika membahaskan titah ucapan Yang di-Pertuan Agong.

Noh sebelum itu meminta penjelasan mengenai pendirian Pas yang sebenar berhubung kritikan terhadap ulama berhubung percanggahan di antara lidah pengarang suara rasminya, Harakah, dengan pandangan pemimpin parti itu.

Abdul Fatah berkata, memandangkan perkataan 'barua' adalah bahasa biasa bagi rakyat Kelantan, maka tindakan Mursyidul Am Pas, Datuk Nik Abdul Aziz Nik Mat menggunakannya semasa menyebut 'ulama barua' bukan bermaksud menghina mereka.

Bagaimanapun, beliau menuduh pemimpin Umno cuba mengelirukan rakyat apabila RTM hanya memetik sebahagian ayat al-Quran daripada surah al-Baqarah untuk tayangan klip video Memali.

"Cara RTM mentafsir al-Quran dalam video klip itu adalah angkara jahat untuk mencelarkan pemikiran rakyat dan saya yakin 'ulama UMNO' tidak berani membetulkannya," katanya.

Sementara itu, Datin Paduka Seripah Noli Syed Hussin (BN-Sepang) yang berucap selepas itu, membidas Pas kerana sewenang-wenangnya memanggil saudara seagama dengan gelaran yang dilarang.

Katanya, pemimpin Pas sebenarnya kini cemas dan tertekan kerana pelbagai isu tempatan dan antarabangsa tidak memihak kepada mereka terutamanya selepas perisytiharan Malaysia sebagai negara Islam oleh Perdana Menteri, Datuk Seri Dr Mahathir Mohamad.

Beliau berkata, Pas dengan angkuh membantah perisytiharan itu tetapi sehingga kini ia masih gagal mengemukakan model negara Islam yang dicanang selama ini.

"Yang ditunggu tak tiba, sebaliknya ajaran penggunaan kata-kata kesat seperti Firaun, Mahazalim dan terbaru pula perkataan barua yang dilemparkan sesama Islam. Inilah golongan yang tidak berhati perut," katanya merujuk pemimpin Pas.

(END)